

# «Inscunter suror ils cunfins da las partidas»

Bilantscha da la sessiun extra muros ad Arosa

■ (anr/fa) Ad Arosa, sin 1750 meters sur mar, ha il cussegl grond lavurà gist uschè intensivamain sco uschiiglio a Cuira. Deputads dad Arosa sezs han giudi da pudair retschaiver lur collegas en lur lieu da domicil. Suenter las sessiuns extra muros a Poschiavo e Samignun s'ha reuni il cussegl grond quest onn ad Arosa. Da glindesdi fin gievgia ha il parlament tractà en la sala da congress dal center da sport sin glatsch sco emprim ils rapports da gestiun dals differents uffizis ed interpresas, a las qualas il chantun è participà. Alura ha il cussegl grond decis era da reveder parzialmain tant la lescha da las finanzas chantunales sco era la lescha da las vias dal Grischun. Ultra da quai han las deputadas ed ils deputads er approvà ina lescha da la protecziun da la populaziun grischuna sco er ina lescha da la protecziun civila. «La sessiun qua ad Arosa è stada fitg agreabla e surtut er organisada propi bain», ha ditg gievgia *Duri Campell*, il president dal cussegl grond, «grazia a quella han ins pudì dad ina vart tractar gist uschè bain sco en la sala a Cuira, da l'autra vart dentant avain nus era gi l'ocasiun dad emprender a conuscher meglier il lieu Arosa ed ans scuntrar cun la populaziun da qua.» Co han resenti deputads dad Arosa quests dis da sessiun en lur lieu da domicil? L'anr ha discurrì cun *Christian Jenny* (pld, Scanvetg) e cun *Ludwig Weidacher* (pld, Scanvetg).

## «Punt per meglierar la colliaziun cun Cuira»

Tuts dus deputads han ditg ch'els hajan gi plaschair da pudair beneventar ils collegas dal parlament ina giada ad Arosa. «Auter che a Cuira nua ch'ils blers collegas van la saira a chasa hai dà qua in bel barat suror ils cunfins da las partidas», ha ditg Jenny. Els hajan pudì preschentar als commembers dal parlament grischun tge che Arosa porschia tut en il sectur turi-



Ils deputads dad Arosa Christian Jenny e Ludwig Weidacher (da san.) fan buna bilantscha da la sessiun extra muros.

FOTO G. N. STGIER

stic, ha menziunà Weidacher. El ha numnà ina speranza ch'ins haja ad Arosa: «Noss lieu è dal tutfatg dependent dal turissem, ed ozendi passentan ils giasts pli e pli paucs dis en ina destinaziun, perquai è in bun access fin tar quests lieus tant pli impurtant. Per quest motiv sperain nus fitg che la 'St. Luzibrücke' vegnia realisada.» Weidacher ha engrazià a la vischnanca ed ad Arosa Tourismus per l'organisaziun exemplarica da la sessiun. Jenny da sia vart ha engrazià als hoteliers che han avri lur hotels in'emna pli baud

che planisà per dar alloschi a las politicras ed als politichers grischuns.

## «Bel ch'er la giuventetgna era sin tribuna»

Christian Jenny ha punctuà ils avantatgs da questas sessiuns en las regiuns dal Grischun: «Grazia a quellas han ils politichers l'ocasiun d'emprender a conuscher las situaziuns specificas en las singulas regiuns e vischnancas, da l'autra vart ha la populaziun la schanza da survegnir in'invista en la lavur parlamen-

tara.» Ad el hai fatg plaschair che pliras classas e lur scolasts eran preschents sin la tribuna per ils aspectaturs. Visitas da la populaziun sezza avess el spetgà forsa in zic dapli. «Per la paja è quai stà il cas fitg ferm mesemna saira a la festa organisada da la vischnanca d'Arosa.» A la vischnanca sezza ha manà la sessiun tenor el plivalur e gudogn ad hoteliers ed ustiers. Nua vegn ad esser probablamain la proxima sessiun extra muros? «En Surselva», suppona Weidacher, «en Surses», di dentant Jenny.